

# PM beri jaminan cari punca keracunan di Perak

UM 25 OCT 1988



Oleh  
**Shahabuddin Hassan**

IPOH 24 Okt. — Datuk Sri Dr. Mahathir Mohamad hari ini memberi jaminan kerajaan akan menggunakan segala tenaga yang termampu termasuk mendapatkan bantuan pakar - pakar perubatan dari dalam dan luar negeri untuk mengesan dan mencari punca peristiwa keracunan yang setakat ini mengorbankan 11 kanak - kanak di Perak.

Perdana Menteri yang membuat lawatan mengesjut ke sini untuk meninjau sendiri keadaan itu berkata, kerajaan amat berharap usaha yang sedang dijalankan secara serius akan menemui segera puncanya agar usaha mengatasinya juga dapat dijalankan secepat mungkin.

Katanya, Jabatan Kesihatan Perak dan lain-lain pihak sedang bertungkus lumus menjalankan usaha yang tidak berhenti - henti sejak kejadian itu berlaku 14 Oktober lalu.

"Sebagai seorang doktor saya menganggap kes kematian 11 orang kanak - kanak itu adalah amat serius. Kerajaan juga serius untuk mengesan punca dan sebab kejadian itu," tegasnya kepada para wartawan selepas melawat dan menerima taklimat mengenai kejadian tersebut lebih dua jam di Hospital Besar Ipoh petang ini.

Perdana Menteri tiba bersama - sama isterinya, Datuk Sri Datin Paduka Dr. Siti Hasmah Mohd. Ali jam 3.30 petang ini untuk melawat para pesakit kes tersebut di hospital besar.

Datuk Sri Dr. Mahathir telah menghabiskan lebih dari 40 minit dengan pesakit dan keluarga mereka, sebelum diberikan taklimat oleh Timbalan Pengarah Jabatan Kesihatan dan Perubatan Perak, Dr. Azizan Ayub Ghazali.

Turut mengiringi Perdana Menteri ialah Menteri Besar, Dato' Sri Ramli Ngah Talib, Menteri Kesihatan, Datuk Chan Siang Sun dan

Timbalannya, Datuk K. Pathmanaban.

Perdana Menteri berkata, sekalipun usaha mengesan punca kes itu telah berjalan, tetapi hingga ke hari ini kerajaan belum dapat memastikan sebab dan puncanya.

Beliau menyifatkan apa yang berlaku sebagai masalah kebangsaan.

Perdana Menteri memberitahu, kerajaan akan menggunakan segala tenaga yang termampu termasuk mendapatkan bantuan pakar - pakar perubatan dari dalam dan luar negeri untuk mengesan dan mencari punca penyakit itu.

Setakat ini, beliau menambah, kerajaan telah pun menghubungi pakar - pakar bagi membantu penyiasatan.

Serentak dengan itu, Datuk Sri Dr. Mahathir

menyatakan amat sedih dan melahirkan simpati kepada keluarga - keluarga mereka yang terlibat.

Beliau berpuas hati dengan langkah positif yang telah dan sedang dijalankan oleh Jabatan Kesihatan dan lain-lain jabatan yang terlibat di Negeri Perak.

## Berusaha

Katanya, mereka yang terlibat berusaha sedaya upaya untuk menyelamatkan mangsa peristiwa sebaik - baik kejadian berlaku lagi.

Perdana Menteri memberitahu, sembilan orang masih lagi dirawat di Hospital Besar Ipoh hari ini dan enam dari mereka sedang menerima rawatan di Unit Rawatan Rapi Hospital Besar Ipoh.

Sejak kejadian 14 Oktober lalu, seramai 11 orang kebanyakannya kanak - kanak meninggal dunia.

Beliau juga menjelaskan kematian seorang gadis di Hospital Daerah Teluk Intan jam 9 malam tadi bukan akibat keracunan yang telah mengorbankan 11 nyawa itu.

Perdana Menteri telah berlepas pulang ke Kuala Lumpur dengan kapal terbang lewat petang ini.

Sementara itu, Menteri Kesihatan, Datuk Chan Siang Sun berkata, laporan Jabatan Kimia mengenai jenis keracunan yang mengorbankan 11 nyawa itu dijangka diketahui Rabu ini.

Katanya, doktor - doktor yang menyiasat serangan penyakit itu telahpun menghantar berbagai contoh makanan kepada Jabatan Kimia untuk dianalisa bagi memudahkan penentuan jenis penyakit keracunan itu.